



南江文鈔卷十一

餘姚 邵晉涵 二雲

敕封儒林郎翰林院編修王雲巖先生墓誌銘

山陰王雲巖先生以疾卒於京師寓廬其子編修增終

日伏地哭瞿瞿梅梅言不成聲傷先生在時食貧游四

方未享迎養之樂遽捐賓客輒長號不已既得奉柩歸

葬乃具行述屬銘於其友邵晉涵晉涵素以父執事先

生又與編修同舉南省習編修家世不敢辭也先生諱

武彬字元震別字雲巖系出瑯琊先世隨宋南渡卜居

會稽五雲鄉遷山陰南楓林曾祖諱某祖諱彥瀛山東

平陰縣典史考諱心枚有學行以孫貴贈翰林院編修
妣沈氏贈安人先生少開敏讀書養志父母忘其貧年
二十三充縣學生父母老家貧將出游嶺南依其外家
乃屏當家具爲累月資授其弟光燮日侍吾親唯吾弟
之賴泣然泣下哽咽久之而別悲夫自周官祿田庠序
之法廢士無恆產矣浮湛鄉黨度不足供膳羞不獲已
出依人晨夜蠲沒親遠身孤非有北山詩人鞅掌之義
與夫精舍傳經出門同人謀道淑身之業也直以內顧
多艱敝敝焉赴折簡之招曠其鷄鳴視寢奉槃將衽之
節勢不得畱涕零就道是豈復有盍簪之得藉名山大
川以自奇壯之情哉然士或不安固窮工媵口說媿嬰
納交富厚惟恐不久固甚者夤緣恠利勢席厚貲耀其
鄉里飾衣冠童奴歲時上父母壽弄姿庭闈充然有德
色嗚呼卿卿咄咄學媚道攫財自驕豈爲親屈耶先生
之嶺南發爲詩多幽怨之音律身嚴毅莫敢以非義告
者每歲館穀悉寄歸爲兩老人朝夕之費布衣革履揖
讓裘綺間無所詘戚黨多業鹽鹺謀釀金贈先生導以
生計先生笑不荅人益以是敬先生孚其忠誠爭欲致
先生用是游轍日遠禮弊亦稍豐父母享年八十餘侍
奉腆潔以時歸省親疾躬奉湯藥治喪如禮編修旣官

於朝乃就養京邸考定漢書音義有請業者語之無倦容嘗出手鈔書尺許示晉涵曰此吾數十年游資也乾隆三十九年病卒年六十二封翰林院編修娶朱氏封安人子二人長增辛卯科進士及第卽編修也次壻女一人先生爲善於鄉友愛羣從拯親朋急難多人所不能爲四十一年八月葬於黃鶯淩於古法宜銘銘曰視所不取貧爲難以白華養無愧顏山陰之原隆其阡潛德弗曜啟後賢

鄔致菴先生墓誌銘

士必以科名爲重則科名足以限人集耦較藝取定俄頃衡得失於一夫之目其不足以限人明矣而鄉國所致用家人所併計而環屬惟在科名舉會史之行嚴鄭之誼淵雲之文皆在所後則科名恆在所重然巍科膺仕不踰時而零落無聞而處士之孝友而能文章者轉得不泯於世則科名究不足以限人我讀鄔君及其配翁孺人事狀而有感也君諱春林初名誠邦字德和號木菴又號致菴系出晉鄔大夫之後元季自寧海遷餘姚世有隱德曾祖諱恩武封行人祖諱景從雲南永昌

道僉事考諱佩珍貢生侯選訓導未仕卒妣朱孺人君
觀書卓犖論古有遠識志不在科第顧承世德爲清門
屈意就經生之業構藝輒冠其曹偶及進而試於有司
又輒報罷然君意不爲阻自試倍常課矻矻不休未幾
而得危病矣先是君少失怙母親撫之旣長亟望其成
立娶於翁孺家女也又以讀書相敦勉旣邁危疾翁孺
人夜禱於神刲左臂肉和藥進之始甦疾稍聞復常業
疾亦時作卒年僅四十有四迹君所致疾疾所以不起
者皆由科名爲之限也科目莫盛於唐考摭言諸書所
稱述每以文章卜人之福澤然其言有驗不驗君本經
史爲文風骨清堅見者心折而終躓於場屋其高詣不
合於俗乎其操鑿者之嗜好固殊乎抑若握籌探筭之
有盈絀而不可爲憑乎使君不早疾疾瘳而得永年庸
詎不得一當然君有從弟曰希文淹雅工詩古文辭當
事欲以博學鴻詞薦已而不果其名之遠與年之永勝
於君而不遇與君同豈亦有數爲之限耶殆豐於名者
嗇於遇耶觀君敦內行事母盡孝居羣從閒雍雍如也
信行孚於友人以緩急告推解無難色其歿也慕義者
哭失聲生平游藝多能書法似顏平原詩好陶靖節有
松竹軒詩稿若干卷然則君實有其可傳者又豈科名

所得而限哉君既歿翁孺人善事耄姑喪葬如禮教子
有法課讀至夜分長而有聞於時庶幾善成君之志而
君之德之著於型家者可概見矣君生於康熙二十七
年六月二十九日卒於雍正九年三月二十一日翁孺
人與君同年月日生卒於乾隆十三年十二月十一日
後君十八年矣子三人朝元附學生早卒朝瑛增廣生
教授里中爲大師朝先孫男三人孫女九人朝元等初
葬君於柳畧乾隆三十六年朝瑛改葬於福禪山傳巷
橋之南追敘行狀屬通家子邵晉涵爲埏道之文惟君
及儒人之嘉言懿行詳見於狀後有覽者宜自得之謹
摭見聞所及爲狀所未及者爲之銘銘曰
輕千金產儲萬卷書唾富兒面訪隱士廬負異才之磊
落而肯爲常格所拘縱邊塞而未顯而識者知爲同甫
之徒

齋而肯爲常時泚泚雖感塞而未顯而端峯味爲同甫
彈千金龜萬卷書而富良而請劉士靈立異木之
蘇貝聞泚泚爲泚泚未又青爲之泚泚曰

之封

敕贈修職郎欽菴府君墓誌銘

府君諱大文字欽菴順天府學生績學有聲鄉里稱其
孝以乾隆二年十二月十日嬰疾早卒其配徐孺人誓
以死守府君仲兄諱大業學者所稱邵厚菴先生也時
知湖北黃陂縣事新舉次子自華卽立爲府君後徐孺
人親撫之孺人事府君僅四閱月耳然能悉府君性情
行事子稍長輒舉示以爲法嘗曰汝父性淵篤少爲君
舅所鍾愛善測意旨言未及而事先備事兄如師然得
果餌必分甘或互推食爲歡笑家故貧思早取科第以
廣親心也力學致疾而延緒於汝汝爲子而不逮事父

讀父書如見父矣汝讀父書而不克繼父之志又安賴
有子矣府君既歿之二十三年嗣子領順天鄉薦又十
年挑選舉人以教諭管任邱訓導事始迎養孺人踰一
年長吏以孺人苦節上聞

詔旌獎建坊如制旋遇

萬壽覃恩府君贈修職郎孺人封八品太孺人于是鄉
先生咸誦君淵睦遺德而孺人維持遷徙以教其子者
爲能成君之志府君先世餘姚人曾祖諱汝楫天津衛
遊擊祖諱秉徵禮部會同館大使父諱琮四川大竹縣
知縣祖父皆以仲兄貴贈中憲大夫河南開封府知府

府君生於康熙五十四年九月初三日卒年二十三徐
孺人山陰人雲南布政司經歷穎之女也少有至性奉
母疾率先子婦日女之事親也日短婦之事親也日長
聞者以爲名言已而果以節孝著乾隆三十九年五月
十九日卒距生康熙五十三年十一月初七日年六十
有一子自華乾隆己卯科舉人借補任邱儒學訓導銓
授開州學正將謀合葬於石景山之原乃命族孫晉涵
爲之銘銘曰

惇學弗施婦節成之孝德承基以大其貽謀

誥授中憲大夫陞授江南守巡道淮安府知府鄭君墓
志銘

乾隆三十八年春余遊江南之鳳陽司正陽書院講席
時壽州知州鄭君方奉臺檄將攝六安州篆聞余至爲
具賓主禮居數日益洽余叩所措施君慨然於鳳陽蕉
萃亟圖修水利以衛民生歎息者久之君赴六安時時
念余不置余旋奉

召入都編校四庫書君亦累擢直隸州知府歲時音問
一如在六安時未幾聞君卒於位余盡然內悲重惜君
將大有所措施略見端緒而遽逝也君歿後五年公子

應元與余爲同官屢得聞君遺事今年秋應元乞假歸
葬其親請余誌墓於是追溯余相從遊處之時已十有
四年君之卒亦粵十年而江淮閒稱頌君政績者如一
日然則君自有其可傳余之文方將託君之政績以傳
也君筮仕鳳臺知縣鳳臺於鳳陽府爲偏縣君下車問
民疾苦縣之東北鄉有通川三日黑濠曰溼泥曰裔溝
匯潁上蒙城諸縣水以達於淮縣人統謂之三河歲久
三河盡涸上流水無所洩秋雨暴漲挾懸出反入之勢
爭注鳳臺彌望成巨浸農時失業君相視地勢以爲非
濬三河則鳳臺不可治時裘文達以戶部侍郎出治淮

潁諸水君具牘上請而文達先時與江南大吏集議所
濬地獨不及鳳臺疏橐已具矣得牘面詰之君侃侃陳
利害及畚揭木石之用廣袤之勢程功久暫之期儻指
無遺算文達廉知君才爲補疏如所請君察土宜穿故
渠三河交暢灑上游諸水以通淮流不逾時工藏文達
亟稱之縣偏隅有魯松灣地遠於淮而土勢窪下瀕歲
患潦君曰順高下之性下者受水則高者成畝田矣周
官水防之法可行也迺營高阜創建隄出廉俸爲倡士
民繼之隄成魯松灣遂稱膏腴君之知壽州也州與鳳
臺接壤君故知州有安豐塘周百里灌田四萬頃楚令

尹孫叔敖所治之芍陂也歲久塘圯爲農田患君審覈舊制復繕舊塘爲水門三十六爲閘六爲橋一其旁則爲塢爲堰爲圩啟閉以時汙萊悉闢歲登民和君自爲文紀其事穆然懷孫叔之遠績焉君循行阡陌見沙地磽确廢不治則以爲古者淳鹵沃瘠分植五穀宜倣其憲行之教民種山薯蒞佐麥菽俾無曠土壽州不知蠶織而地多椿樗可飼蠶迺構蠶種於山東教之飼養於是壽州農功桑功並興四民樂業余數往來鳳陽察土性耕植所宜與江以南相近惟壤地平行水無蓄洩歲苦旱潦民亦嗇窳偷生輕去鄉里當事者視爲固然莫爲計久遠往者靳文襄嘗建議屯田鳳陽事中止君講求水利行之縣及州胥見其效誠推而廣之又豈獨鳳陽一府爲當舉行哉然自去歲鳳陽旱民多流離今春余過其地居者尚有餒色獨鳳臺壽州以水利之修秋成稔於他縣是則君之德澤旣久而能及人凡當世之有志濟民者舉宜以君爲法而民之謳思於君固宜其逾久而不能忘君擢淮安知府淮安故水鄉君夙諳水利謂聚眾水以爭一門淮所以潰也疏之其不可緩於府之東開濬東鄉澗市河於北則開漁濱山字河於西則開護城河壅滯旣通田陌資灌溉引其流兼濟漕運

民便之近者河淮屢告漫決矣誠得如君者與之求疏治之宜不求速效必能遠籌久計奠濱水之民於救寧惜君在淮安僅一載有餘也君諱基字築年號定堂廣州香山人先世居浙江之浦江曾祖一岳明進士累官吏部驗封司主事殉國難祖考標縣學生考懿貢生祖考考俱以君貴贈奉直大夫君少孤力學爲諸生以詩文著聲數躋鄉闈由例貢就銓授鳳臺知縣調定遠知縣卓異擢壽州知州權知六安州遷泗州知州陞淮安府知府四十一年四月詔以巡道補用君先得疾聞

恩命感激嗚咽越八日而卒距生康熙六十年二月甲子年五十有六娶何氏繼娶李氏俱贈恭人男子子三人應元翰林院庶吉士今爲內閣中書應卓應翰女子子二人長適國子監生李咸欽次適國子監生郭燦應元等於某年月日葬君於某鄉余謹以所聞於江淮之民者彙括爲辭俾江淮之民歌而思之其辭曰

望行軒兮颺兩旗善平反兮決所疑頌孝肅兮再見之
舖井里兮療吾饑覆以廈兮燠以裘水就道兮神爲謀
蟠蛟螭兮安兕牛墾原田兮腴腴登稌黍兮若飴飽德
兮鼓腹而熙江南北兮羣所依奚遄往兮乘尾箕歸安

宅兮粵山之陞神陟降兮淮水之湄樹豐碑兮奉靈祠
祀桐鄉兮勿替歲時

誥贈奉直大夫內閣侍讀吳先生墓誌銘

維吳氏遠有端緒先世自徽州遷浙又遷金陵著籍上
元代爲清門其自上元移居京師自封侍讀岸舫先生
始然先生之來京師非卜居也以經術教授南北客京
師十餘年就室有子嘗攜家南返矣旣歸而子得危疾
若有憑焉夜輒張目曰此非吾所居先生晚得一子愛
甚視其疾悸甚告先塋曰吾命固當遠遊耶禱之吉遂
北行都門士大夫爭迎致先生若劉光伯之傳經程沙
隨之授易以講肄爲家者卒以光啟令緒俾昌所學而
鳩厥宗先生之畱貽者遠矣先生諱鴻基字孟遜岸舫

其號也祖諱尚忠國子監生考諱之璉贈奉直大夫妣龔氏贈宜人先生少開敏嗜學通經史爲上元學生治舉子業有聲屢擢高等時江左多知名士或競聲氣爲繫援如唐人所云通榜者先生旣嫉之鍵戶著述出則涼涼獨行歷應南北鄉試卒無所遇然遠近知敬慕先生問字者屢相接南遊之八閩復折而入中州前後居京師最久弟子著錄數百人多以經術起家先生教人必先敦行抑遠浮薄能面折人過聞者感其誠好周人緩急亦不自以爲德也著有岸舫齋集若干卷皆客中寄意之作晚而歎曰吾旣不獲行所學而卒老於行豈

非命耶然當先生壯時達官貴人爭欲屈致先生而先生終不肯屈殆所謂吾道自應爾其守有不可及者耶乾隆九年三月十八日卒於京邸距生康熙三年九月十一日年八十有一以子貴贈奉直大夫內閣侍讀初娶於汪繼以何俱早世繼娶顧宜人於京師有婦德嫺詩書持門整肅使先生無內顧憂生於康熙二十九年八月十一日卒於乾隆二十三年九月十八日年六十有九子肇元以大興籍登乾隆辛未進士內閣侍讀學者所稱百藥先生也孫六人裕昆候選州同知裕德翰林院庶吉士裕仁丁酉舉人裕義候選縣丞裕信監生

裕智諸生孫女五人晉涵與裕德爲同年生得以假館數奉教於侍讀聞先生行誼甚詳侍讀每言居燕非先生初志謀奉柩歸葬上元會疾作不果四十四年正月二十日卜葬於安定門外某坊屬晉涵爲之銘銘曰學優遇齋視命爲之豈卜居之遠近而亦有所司伊講學之故地歸藏是宜惟世學之克承以聚族於斯

戶部湖廣司主事來君墓志銘

明蕭山何御史舜賓以請復湘湖水利爲人所陷害子競冒死復父讎卒能復湘湖之舊以成父志競以此名聞天下稱何孝子事具明史我友來君江臯居鄉以孝行稱獨畱意縣中利病不爲勢力所撓規復水利竟以勞瘁得疾而卒事幸得直故名不出於里中然其志行與何孝子先後有相似者君子成龔請余爲埏道之文余敍君之生平願爲當世之有志於民生利病者告不僮爲一鄉一邑言之也君諱起峻字魯登江臯其號也世居蕭山之長河代有聞人爲紹興著姓曾祖藻府學

生祖長森考繼儒縣學生君生有異稟早歲能文章博覽載籍務得其要怡乾隆二十四年舉於鄉三十七年成進士授戶部湖廣司主事先是君爲諸生家居授徒藉館穀以營甘旨盤匱之奉晨昏之溫清非躬親則中懷震惕恐無以當父母心故未嘗輕出百里外公車六報罷卽日歸四千里往返父母按行程以計其歸日弗或爽也官郎署甫三月念父母不置慨然曰人之生依父母以生吾今者適不知有生之樂也卽日引疾歸授徒如故時侍親側談說故事閒爲孩笑相娛樂或奉父遊行阡陌雖田父販婦遠望皆起立相贊慕久而阡陌閒至曹偶無詈語居喪哀毀盡禮君至性爲士大夫所難鄉居不事表襮鄉之人亦不言胥化也然君家居勇於爲義視縣中利病悉昌言之舉行必盡善而吏胥之作姦者及豪民之悻利者率不便君所爲相與騰謗語或起而爲難君持之不變卒以集事顧於湘湖水利爲尤力湘湖者濬築自北宋蕭山鄉田所賴以灌溉也屢廢而復然惟何孝子之復湖爲最艱其事亦最著歲久法弛沿山之陰涸爲原姦民規爲利藪互東西築之隄度以步者三千相望謀占射勢未已君省知之迺告縣中薦紳曰數百年衣食利賴之原柰何坐視其廢棄乎

湖爲畝三萬七千漑九鄉田十四萬有奇今盜湖三百是千四百畝不得漑也是九鄉十四萬畝胥不得漑也豪民專其利愿民噤不敢言及今不治後習爲常將使九鄉之田盡爲焦壤邑中利害孰大於此非士大夫任其責疇任其責者皆曰諾則相率而白於知縣知縣聞君有孝行雅敬君及見君辨論斷斷不置心嘆之廉得侵田者主名不時捕侵田者恃有繫援招羣不逞之徒要王進士宗炎於途狙擊之宗炎君之同志也君從後至爭前裂君衣以救得免侵田者大闢勢益張明日知縣覈湖田歸獄築夫薄其罪餘不問君直前曰某今者

豈有恩怨於其間哉侵田擅利者不過數人而九鄉之被其害者不啻數萬人明府縱欲寬此數人獨不爲數萬人之生命計乎則曷不罪此數人之侵田者以謝數萬人而以某一人謝此數人某無憾知縣面發赤合前後左證侵田者不能舉辭卒抵罪剗其隄湖復舊紹興環山而濱海厥土塗泥非湖陂爲之淳豬非潘術爲之宣洩則歲事不登故湖陂者東南民食之天也余家餘姚去蕭山二百里而遙餘姚西鄉有湖姦民射爲田害及一鄉余選懦又居鄉日少目擊其害不克救聞君釐正湘湖事未嘗不自愧然湘湖在明中葉嘗盡廢矣何

孝子父子相繼萬折不回再煩廷議始得復百年之利因以成其孝君素以順德孚於人故士大夫皆樂於從君而官於其土者亦有所敬憚委蛇從君議然非君豫見萌芽迨盡廢之後出全力與爭亦難驟挽是則君之先事弭患有德於其鄉者甚大推君所欲爲上考古人兩山有川之勢高高下下則西北之水利可興惜乎君所爲者僅試於一鄉也君又議繕西江塘由蕭山以及山陰會稽爲江海保障量廣袤倨句之數計役授功庀材未蕝會夏霖雨大至君冒雨循塘行號近毗具苦蓋畚畝以保塘而塘內積水已盛漲田疇彌望成巨浸則

亟走三江閘洩水以救田疇雨甚舟幾覆跣行十餘里閘啟水降田疇得無恙君以此得病病遂不起是則君於鄉里庶幾所謂以死勤事者君歿後數月同縣鄭進士應蘭何舉人其葵奉君成議繕西江塘告成縣人益思君不釋嗚呼是亦君不失言於人之效也君生於雍正六年十月某甲子卒於乾隆四十九年九月某甲子年五十有七配某安人繼配朱安人俱先卒男子子一卽成龔縣學生女子子一適同縣學生王鎮南成龔將以某年月日葬君於某原銘曰
辭祿養親哀慕終其身和順之氣卽之溫溫及其決大

疑臨大事而莫能奪者則由於勇以成仁志未及展而
試行一鄉者澤已被於生民古之鄉先生歿而祀社者
君殆其人與

翰林院侍讀學士彭先生墓志銘

國史館在東華門內遴翰林有才望者爲史官辰入酉
出紬金匱石室書鉤稽閣部院故牘排覈年月前後著
於篇館臣或不逾時遷去新進或不得要領遇疑難欲
得質正必曰彭鏡瀾先生先生早入翰林在館久且年
長並尊禮之曰先生先生諳悉掌故隨時荅問覆審無
少忒竟歲纂集不以寒暑閒泊然不求人知閒有知而
稱之者先生泊然如故同館相嗟服先生不僅勤敏過
人其鎮靜自守實可爲後進法先生諱紹觀字容若鏡
瀾其自號世爲江南長洲人曾祖定求翰林院侍講祖

正乾考授州同知考啟豐兵部尚書先生五歲知讀書
長有文譽乾隆十二年舉於鄉二十二年成進士改庶
吉士丁母夫人憂二十八年授編修明年充國史館
纂修官時劉文正爲總裁深器之曰端人也宜修史三
十三年考試翰詹高等擢贊善充日講起居注官四
十年陞侍講尋轉侍讀明年擢侍講學士旋充文淵
閣直閣事四十五年轉侍讀學士中間分校會試典山
西鄉試俱得人四十九年丁尚書公憂服闋補原官仍
入史館於是先生在館幾二十年矣橐本麤具多取成
於先生近歲總裁知先生勤職靡倦因追理文正曩時
所歎爲不虛云五十六年四月丙午歿於京邸距生雍
正六年九月某甲子年六十四配蔣氏封淑人子二人
希范廣東合浦縣知縣呼嵩國學生早卒女二人長適
內閣中書葉元符次適廩生閔思瑞孫三人先生始終
史事論者比諸唐之吳兢元之歐陽原功晉涵追隨史
館也久得昕夕奉教益愧不能如先生所爲誌墓無溢
詞猶先生志也銘曰
翫骸以競好乎寧諒頹而不渝乎鞶悅之外耀乎寧榮
繭之內舒乎吁嗟先生兮繫古與徒

南江文鈔 卷十一 三
敕授承德郎戶部福建司主事何君墓誌銘

同館何檢討思鈞過余述厥兄承德君遺事貌甚戚辭
哽咽不成聲因出行狀請余爲埏道之文君嘗宦於吾
浙江余夙聞君善政及讀狀迺知孝友睦婣之德始終
無忝古人實應銘法矧重以檢討之請誼無可辭按狀
君諱思溫字聖容號石峯先世自河南遷居山西之靈
石縣遂爲靈石人曾祖諱某有隱德祖諱某惇善喜施
予鄉人德之父諱某縣學生候銓州同知以君兄弟貴
祖父俱贈文林郎翰林院庶吉士晉贈中憲大夫戶部
福建司主事加五級妣贈恭人君少開爽讀書有遠識

偕儕輩角藝超越等倫會父歿迺躬持門戶壹意課季弟學弟卽檢討也時年甫十有二攜幼妹依君以居君外肅內和愛檢討特甚教特嚴檢討嘗遘危疾親調藥餌撫視茲蓐間夜不寐暇輒搏頰於天喃喃籲祝病瘥乃已復爲遠道延師師亦感其誠訓倍常課至今檢討語及輒悲噫謂微吾兄無以至今日云檢討學旣成前所攜幼妹年及笄適人成禮矣君慨然曰吾聞友于亦政施有遠近吾今其試諸遠乎引例謁選人授浙江武義縣知縣當是時浙江大吏相繼以寬厚廉靜爲治及熊巡撫學鵬莅任尚綜核君故有經世才善決事然性

慈愷不喜擊斷循行阡陌間遇溝防困窳宜修者涂徑宜正者梁圯宜復者立呼里正鳩民繕治之事已起去民不知役農無廢功吏胥或數月不出城門而村民得數見令君故民間隱曲無不知縣中有大利弊當興除不煩寬譬事畢集民氣大和巡撫不甚知君道過武義聞輿誦翕然訝甚及見君貌樸語伉直遽詢曰何術致民譽君謝曰主臣特性不好懶耳巡撫拊手喜曰官不懶民不勞矣得譽諒哉調繁知定海縣不一年以疾告歸余在會城聞君嘗奉檄監工西湖勞瘁得疾武義人聞之聚禱於城隍神焚香有泣下者或徑走杭州環行

館外踈問起居絡繹不絕定海去余家爲近縣民爲余言自君之官絕洋船入境之饋商貨懋通吏無所容其姦島民安業士行以修惜其遽去也然自君告歸後數年浙中吏治少異至近年屢煩部院大臣駟至浙江廉問讞治矣縣官自好者亦自愧不能爲君所爲而父老念君至流涕以爲不可復得嗚呼豈君之告歸亦有兆於先幾者存耶然君病旋愈起知直隸武邑縣移知豐潤縣治如浙江兩縣之民頌君者亦如武義定海然則非吏道之難而得其人以稱其職之難也君之才之德殆不可及哉君在豐潤未久捐陞主事得戶部福建司

方欲黽勉部務未幾卒武邑人奔赴者泣於道先是君居鄉歲稔倡率族人釀三千金按籍分給里不知飢事竣或欲碑紀其事力卻之生於雍正五年二月丙寅卒於乾隆四十二年八月甲寅年五十有一娶吳氏贈安人繼娶王氏封安人子三道榜國學生軍功議敘六品頂帶道模附貢生道範女五長適候選兵馬司指揮喬元斌次適中書科中書楊譚次適候選理問楊溪次適王某次適陳某四十八年九月丙午葬於郭壁原余旣据檢討之狀敘君世系而復以所夙知者爲之銘曰鷹鷲而雄面帖背憎疇則如君循蹟可稱匪余之是稱

鄉黨之言允矣足徵

誥授光祿大夫太常寺卿倪公墓誌銘

國家亮敷文德慎簡省成以詞臣入直

內廷九重厥選錢唐倪公由翰林侍

皇子講讀二十餘年嘗游歷容臺總稽糧儲迴翔卿寺
然始終以文學結

主知其誠懇詳慎之忱又足以孚其學

倚畀方殷迺遽以乾隆四十八年二月庚寅卒於位孤
子時慶將扶柩歸葬謁余請銘余交公久雅知公誼無
可辭按狀公諱承寬字餘疆號敬堂先世從青州遷於
杭曾祖元階錢唐縣學生祖天駿隱居有惇德考國璉

刑科掌印給事中鳳穎等處宣諭化導使三世皆以公
貴累贈光祿大夫禮部右侍郎妣周氏暨曾祖妣祖妣
俱贈一品夫人公少穎異日記數千言天性孝友逮事
王父母能得其歡雍正十三年舉於鄉乾隆七年考取
內閣中書踰年給諫公以奉使勞瘁卒於穎州公徒跣
奔喪扶柩江還鄰舟不戒於火燎將及公搏穎驚號風
輒返人以爲孝感服闋補官協辦內閣侍讀十九年成
進士以一甲第三人授翰林院編修不數月丁周太夫
人憂公少時食貧給諫公遊四方太夫人紡績供食篝
燈授讀輒舉古人嘉言懿行以爲教故公自少識趣開

遠好講求有用之學迎養京邸退食卽依膝下陳說今
古時作孩笑以爲娛侍疾則匝月不解帶居喪水漿不
入口者五日淚盡繼以血其後遇忌日必哀號飭家接
事言必稱先人居常守所教無改余嘗謂公之事親能
以孺慕終其身云二十二年五月散館一等十二月上
書房需人大學士史文靖公薦公人品醇謹學問優長
奉

旨在上書房行走明年三月

御試翰林列高等陞右中允旋遷太僕寺少卿三十一
年

南江文錄 卷十一
特擢內閣學士明年授禮部右侍郎三十三年
命提督順天學政三十七年署

經筵講官禮部會試知貢舉武會試充正考官是年冬
調戶部倉場侍郎公性精敏善決事然好持大體務自
韜斂遇事以身倡率不辭勞勩所至蘄盡職人服其誠
太僕寺司廐牧公勾稽故牘覈每年孳生疲廢諸實數
杜其浮冒見奉天司牧官開懷與語無敢隱居官七載
牧政以修其督學順天也公先嘗隨侍厥考視學湖南
多善政楚人至今稱之公乃遵循其成法躬親校藝引
諸生几案前娓娓吳語因文而迪以行終日不倦諸生
莫不奮激有聞而感泣者歲科兩試前列及所錄童生
多連取科第又莫不服公之精鑒畿南順德廣平諸府
俗多緩葬公引古人不葬親不得服官之禮令未葬者
不與試申以期不率教則暫革其衣頂葬畢復給俗爲
一變其維持風教舉類此泄倉場一載正己以率屬積
弊悉除公本有經世才持以縝密故敷歷胥有成績而
在 內廷爲最久誦法服習循循有方幅行止不失尺
寸獨居無隋容及總督倉場仍

命於漕務之暇入直如常直廬在澄懷園之近光樓樓
前方沼有芰荷蘆葦槐柳之勝退直輒吟咏其閒夜篝

燈讀書仿古帖每至夜半周廬環衛之士望見樹陰燈
火率指目爲倪翰林書燈公歷致通顯官卿貳矣稱翰
林從其朔也未幾以內監高雲從牽連被逮先是公偕
同官申侍郎保連名奏事待命朝房雲從適趨過申侍
郎問爲誰公曰高太監雲從遽還走詢公公曰是申倉
場會雲從以泄禁中語下獄詰所往來公亦以是語連
及吏議重譴

天子稔知公廉公無他

命以編修仍直上書房四十三年授鴻臚寺卿明年轉
太僕寺卿又明年授太常寺卿公疊荷

恩綸感奮激勵益勤於其職遇事必求無纖毫恨而後
卽安神氣大耗然鬚髮未衰步履如少壯今年正月齋
宿中寒寢疾沈綿竟至不起斯則朝野同爲惋惜者矣
公風度詳整不立崖岸當官則不少假借奏對每
嘉其誠實賡和詩文悉稱
旨嘗於

行圍進鬪鹿賦文不加點詞理精密同館咸推服旁通
繪事其書法尤爲人珍重片紙輒藏弄不知特公之餘
技耳公有姊適吳氏姊疾嚼指血作文禱於神奔走數
百里爲求醫藥病遂愈後姊歿攜孤甥華至京師撫視

成立廉俸所及分給宗族旁推及三黨皆有恩義故頌
公者遠近無異辭生於康熙五十一年十月乙卯其歿
也年七十有二元配項夫人早卒繼配章夫人附貢生
本仁女章夫人有婦德早歲以孝稱治家有法俾公無
內顧憂慈以逮下與公相敬若賓先一年得末疾公歿
一月強起上食撫筵一慟而絕生於雍正八年七月丙
戌卒於乾隆四十八年四月甲子年五十有四男子子
二時慶分發江蘇候補縣丞新吉公七十歲所生也女
子子五長適國子監生馬植基次適國子監生陳玉繩
次適候補從九品黃駿次適進士莊述祖次字沈某孫

一壽齡孫女一某年月日合葬於某原銘曰

公以帶經世胄潤學懋文賡颺

盛治爲鳳麟而雅志專屬輒慕朱文端之爲人持事以
恪故大綱之悉舉雖小物而必勤晚始特達中更翔次
而始終葆其真純倬直

清嚴列卿表率猗文端之等倫歟武林幡員湖水粼粼
定論傳後視此貞珉

誥封中大夫候選道金公墓誌銘

前史標列孝義推原風化之本用以厚人倫敦行誼修德於鄉閭而名顯當世一節之奇猶足以扶樹道教勸勵末俗載筆者臚列爲表曰事親盡孝曰同居敦睦曰助官賑濟類舉姓氏綜覈大端不求其備若兼數者而並克自致在古人亦歎爲難能卽不自表襮而潛德卒不可掩若與齋金公信乎其克兼數善已公諱肇鐸字自白晚號與齋先世爲休寧望族祖諱建烈以明末避亂遷杭州考諱坤泰樂貧勵志經學教授里中爲大師公其叔子也性醞粹早歲就塾危坐讀書儕輩犯者弗

與校鄉先生器之繼以營甘旨往來紹興約居意興豁如顧念親不置數日必馳書問食增減節寒煖百里外若在左右偶得嘉果慮親未食正席不敢嘗方親迎而母得暴疾躬奉湯藥不入內室連執親喪泣血營葬逾大祥不見齒紹興爲公舊遊地信德孚於人遂以鹽筴起其家昆季四人友愛甚篤兄沒爲從子授室親教育之公有從弟曰肇鑾少同學長有能詩聲公引以自輔時與酬答肇鑾病革公爲不解帶者旬日恤其遺孤閭黨多待以舉火推解無難色而公則循度守約泊然如寒素及諸子克自立公旣授家政乃集其諸子及羣從

而告之曰新安故吾土也吾先人避地遊浙遭亂失上世丘壟夫遠遊而迷其故阨則悲心更微今居杭閱數世矣余念及隱痛時搏顙就問遺老迺知休寧之富瑯村殯於前者吾高祖暨高祖妣也殯於後者吾曾祖暨曾祖妣繼曾祖妣也先時貧不克葬旣而子姓日增分居杭越又有謂舊冢不宜變更分蔭互有得失而相持不葬今自高祖以下余年最長矣失今不爲誰任其事若夫陰陽拘忌地師壽張爲幻豈足聽哉子姓皆曰諾遂之休寧卜葬其高曾祖於殯所封樹如制復由高曾以上溯遠祖以次立墓表用示後昆而立家廟於杭州

南江文金 卷一
嗚呼自墓大夫定兆域之職廢而時葬之法不行地師始得爲向背吉凶之說以惑人後世慎終之誠不勝其富貴利達之見因方位之順逆干支之盈縮人持一說而靡所適從也遂至於緩葬因緩葬之久慮有分支之興替也遂至於終不克葬夫情事未申古人以爲隱恨有故而未葬聞者諒焉逮力可卜葬而復計較於利害則利害之心勝而敦本之志荒於義曷取矧天下固未有舍其本而能趨利避害者若公之安厝宅兆由高曾而達於上世尋源溯本藹然仁孝之思而子孫日以繁衍是可以悟末俗之執迷而廢葬書之膠譎矣公赴義若飢渴乾隆戊辰金川用師倡輸軍食公以候選州同知蒙
恩敍卽選用十六年二十一年里饑倡捐賑恤大府旌其義行復蒙

恩敍得官日加二級紀錄一次公性恬退不謁選人家居惟課子孫勉爲善以長子傑補道加一級

誥封中大夫年八十壽終生於康熙三十六年九月二十八日卒於乾隆四十一年十月十五日娶山陰王氏繼娶錢塘吳氏早卒俱贈淑人副室項氏贈宜人子五人長潮候選道加一級次瀛議敍卽用主簿次江未娶

殤次海議敍卽用州同知加頂帶一級出爲仲兄後次
泳候選布政司理問加二級女二國學生吳秉倫仁和
庠貢生龔澡身其婿也孫六人柯候選布政司經歷棻
國學生棧翰林院孔目杖槿枝俱業儒孫女四曾孫女
二先時潮等葬兩淑人於赤岸山復以公素愛西溪之
勝卜地於九龍沙石人隴葬以四十三年九月二十九
日項宜人耐屬余爲之銘余未及見公公從孫黻爲余
同年生述公行事甚悉余又見董浦杭先生道古堂文
集稱公儉而讓端靜不苟訾笑引爲畏友是則公之篤
行固徵信於鄉論矣矧戚黨之頌德者累屬而不勝書
也爰爲之銘曰

稔侯啟世肇漢翊興醇風無斁施厥雲仍善人爲紀明
德克承曾季是模孝乎惟孝引翼敷類豈弟神勞惇誼
彰聞

帝錫丹誥耄年粹德篤念宗祊歛村訪墓相位而葬不
淆俗論修祀孔明歸藏西溪神依故里懿行題阡昭茲
孫子我銘足徵徵諸舊史

淇縣典史汪公暨配方孺人

旌表雙節繼配王孺人側室徐孺人合葬墓誌銘

公諱楷字南有汪氏先世出唐越國公華後自婺源遷於鄞又自鄞遷蕭山之大義村遂世爲蕭山人曾祖造祖必正考之瀚妣沈太孺人公考隱德不仕嘗治丙舍墓田合族黨好扶植寒畯行義甚衆公幼而端良長試經義有司不售以謀養習法家言旋自慮曰吾以是養萬一明不至輕重失準卽不必有鬼禍茲虧吾孝將吾世不長吾何可不慎於術遂去而爲賈先是公娶方孺人幾十年未有子納徐孺人爲副室居一年舉男子一

人公賈亦日贏以資補河南淇縣典史赴淇之三年方
孺人卒於家其明年繼室以王孺人王孺人會稽名族
徐孺人則家世單寒矣然而兩孺人交相愛也交相敬
也公故諳法家言亟於上官前爭疑獄申闡律意侃侃
不稍挫上官亦夙聞其明律不以微秩易視之聽其言
爲平反冤獄出死罪數人性仁慈以公事答人輒曰彼
得母以憤慝戕厥生乎不憚者累日九嚴取與之辨歲
時部民致魚菽之餽力卻不受偕兩孺人粗糲自給久
之貧益甚引疾去官其明年丁父艱公之未赴淇也嘗
置田百餘畝比之官而公之弟縱飲博於家盡鬻之鄉

黨爲不平僉謂公亟訟理田可復公曰吾弟闇弱不良
人陷誘至於是吾直於官吾弟受官胥窘辱吾不忍且
何以安兩老人過弟如初稱貸以爲養遭喪稱貸舉斂
葬而公之弟尚負酒家博徒錢諸酒家博徒見公不治
前田而辦喪葬甚具以爲公在淇畜財不貲又以公友
愛甚決不忍厥弟責逋日棘而公果一一應之於是負
累益重矣公將依人之廣東臨發自傷語兩孺人曰吾
卽不歸老母穉子誘誣若兩人矣兩孺人怛然心惡其
不祥飲泣五閱月而凶訊至頃之匱反兩孺人觸匱擗
地不欲生而公之弟不視喪飲博如故無賴子更從而

蠱煽之令從兩孺人索錢或夜同無賴子麋至壞門壁倚酒喧呶詬厲至摔孤子挫撻爲恐嚇必得錢戚黨或爲畫策曰宜避地去幸存活徐孺人曰避去若等迹而來猶弗避吾守吾故居以死衛吾孤捐肝膈吾不悔吾違恤其他王孺人曰無然夫子往出門作何語今者吾與汝不可以不俱生不俱生勢單若輩魚肉吾兒謂夫子何且姑在吾與汝不可以不俱生於是陽爲好語約以操作所入次第償小叔所負錢無賴子知不可柰何始稍稍去悲夫發居而食貧至門內人不見信謂實自封爲僞貧朝暮織作代償所負而見謂嗇於財實圖自

富伺釁侵凌日劇如是五六年而後貧狀著信兩孺人至衣葛以卒歲減口食奉姑食孤疴病扶牀起手足不休門內門外人然後歎息悲咽悔悼前之爲嘖嘖誦兩孺人孝德高行於是推知公孝敬篤友之誼爲不可及公歿後十餘年孤子旣授室以貧窶不得已復習法家言兩孺人每舉公遺訓恐虧德而不獲長世申誠再四孤子泣受教佐人治獄依於慈久之學行著於時連取科第起其家於是遠近又追溯公之仁慈能光啟於後而兩孺人並以貞節成公志者厥功甚鉅公卒廣東爲乾隆五年十二月辛亥生康熙三十四年正月乙亥年

四十有六孤子輝祖是年十一歲徐孺人以乾隆二十七年三月庚戌卒距生康熙五十一年十二月辛卯年五十有一卒後兩年浙江大吏以事上聞得

旨與王孺人並旌節孝後四年太歲在著雍因敦建雙節坊大義村是年輝祖舉於鄉後七年輝祖成進士是年三月癸酉王孺人卒距生康熙五十二年十二月癸巳年六十有三輝祖自京師奔喪歸以是年十一月乙酉合葬於山陰縣清和里秀山之阡男子一卽輝祖湖南寧遠縣知縣女子四陳珏孫世埰陳柔之沈仁竣其婿也孫男五繼坊乾隆丙午科舉人繼壙繼埵繼培繼

壙孫女四輝祖交於晉涵也久屬爲銘晉涵懼無能彰著潛德屢易稿未成而輝祖亟言之不已迺勉爲之銘曰

典史卑官公克戔戔豈弟而文雅礪廉不肯頗孝于父母友于弟內行完且美王徐兩孺人爲公守義奉公母成公子嗚呼艱哉冰霰充橫松茂掬香嗚呼大義村汪氏世世子孫敬共斯藏萌蘖母傷實越國之光也

例贈文林郎悠園陳君墓誌銘

乾隆四十五年春懋舉會試

恩科同里陳煦以高才舉禮部試羣慶得人而厥考悠園公先期歿於家赴至京師同舍生偵煦他出謂其不日應

殿試不欲遽聞而煦已心動焉皇索家書勢不可掩比聞赴則長號仆地毀幾滅性星奔歸里其年月日將卜葬於某原請晉涵爲埏道之文晉涵與煦交夙知君鄉黨之耆舊也不敢辭君諱標字南陽悠園其號也會祖諱尚德祖諱諤贈修職佐郎於潛縣訓導以任卹聞里

中考諱宗海縣學生君五歲而孤母諸孺人持節躬撫之比就塾性開敏文日有聲會祖歿以適孫當理家政諸孺人憫君質羸令輟舉子業注籍國子監生君所居在餘姚之東鄉其邨曰東塘前後巖壑幽秀宋元間隱君子多居其間君親課農桑以暇登眺山水搜奇訪軼意趣殊遠歲入既稍豐因慨然曰古者郊野委積之法獨不可神明其意以試行於一鄉乎迺節縮所入別爲侍儲視歲歉輒減值以給貧人告緩急者調之稱貸者久不克償輒折閱其券余少時屢過東鄉舟子相語於川涂者行旅憩郵亭者多述君行事爲美談或曰君正人也不爲邪所干所居不數里或舉家病疫俗多畏忌親串莫敢過其門君獨撫治之爲召醫給藥餌舉家得活君亦無恙或又曰君仁慈人也備於其家者得病必時飲食軫疾苦有竈下養老且憊矣君曰是無所歸養之使終其天年既歿則召其從子給數緡爲葬或又曰循東塘而行風雨之夜有燈光出籬落者必陳氏讀書燈也聞君善訓子午夜親講授行且大昌顯矣後晉涵舉以問煦言果信晉涵考縣中舊聞元有岑山人安卿者居栲栳峯下以植德行義著於鄉君里居相近而德義亦復相埒豈數百年山川之氣前後相映發歟然岑

山人之詩爲人所傳誦而其德及一鄉者四方或未盡
知君不事表襮故名不出鄉黨然君亦好爲詩所著有
悠園草後悔其少作焚之厯有存者君文藻貽諸後人
其表彰者方遠且久也君生於康熙五十年九月某甲
子卒於乾隆四十五年三月某甲子年七十配徐孺人
有婦德先君三年卒子五人變乾隆三十六年舉人早
世煥縣學增廣生煦乾隆三十九年舉人四十五年會
試中式四十九年進士燿燁女三人長適學生胡遠山
次適高濱次適學生馬增孫男十二人孫女十四人銘
曰

歲執徐兮登公堂瞻遺像兮神肅莊豐其施兮葆其光
善斯積兮後有慶

善謀許令封亦襲

馮輝翁令登公堂謝靈翁令師肅其

誥授中憲大夫兵部車駕司郎中宋君墓志銘

君諱國樞字瑤佩號韻亭世為山西汾陽人曾祖某祖

某父某代有醇德祖父兩世俱以君貴封中憲大夫妣

皆封恭人君讀書務講求大義不屑屑章句年十五居

父喪哀毀中禮事母馬恭人善承意旨鄉鄰稱其孝乾

隆二十七年以豫工例謁銓曹授兵部職方司主事旋

調武庫司君勤於職事昕入暮歸不以寒暑閒部中卿

貳交推重之連充順天武鄉試提調三十四年奉

命勘保定所屬官地君嚴飭丁役所至郵舍宴然若不

知使傳之過而於疆里之廣袤交錯靡不周知事歲為

南江文錄 卷十一
當事言道涂之縱橫高下種植之宜民生之利病若圖
列而指數聞者折服俱歎君素有經世才顧樸訥不事
表襮茲甫試以事輒見效異時當盛有展施云三十五
年丁母憂家居輯族譜服闋補原官上官雅知君京察
列薦牘引

見以知府記名旋擢車駕司郎中四十三年以他事牽
連去官寮案代爲扼擊君恬適若平時五十五年

萬壽祝釐給員外郎職銜逾年君六十生辰京師士大
夫爭爲詩文壽君君謝之曰生平無他長惟課子弟以
讀書務本不作無益害有益所以敬承先志也藻詞見

譽吾何當焉君貌癯氣清望而知爲長者好爲德於鄉
縣中荐饑君舉行趙清獻救蓄之法按戶給糶幣歲稔
乃止全活者無算所居鄉地形窪下夏秋多積潦行旅
病涉君相視中衢甃石爲坦途人便之復與從兄某勸
立義塾以課里中子弟之秀而貧者君雖未獲大有所
展施而效之見於一鄉者已若此卒於五十七年十二
月某甲子距生於雍正十一年九月某甲子年六十配
韓恭人子二人毓鏐禮部司務揀發南河同知毓鋌國
學生女二人長適布政司經歷趙綱正次適國學生姜
瑞曾孫男四人其瀾國學生其濬其淮其潛余與毓鏐

善毓鋌其瀾並從余遊習知家世事毓鏐將以某年月日葬君於某原書來請余爲銘誼無可辭乃爲之銘曰君之里和藹其凝藏之域蔚然霞蒸善滋戩祓宜被於雲仍

貴溪縣縣丞署建昌縣知縣陳君墓志銘

君諱宗江字匯川先世自常熟徙居蘇州府城曾祖時憲州同知舉鄉飲賓祖又恕亦以州同知需次父璽候選州判妣吳孺人君性端嚴有器識讀書志在經世應順天鄉試不售輸貲以主簿分發江西先是君從父知河南之陳畱縣君往佐理從父調署淮寧祥符丞鄭某攝陳畱篆乾隆二十六年河決中牟之楊橋口適鄭丞行縣阻水曲輿集不能歸君亟乘城督民湮塞不一日而水數丈去雉堞三尺許居民恃君以無恐君又結筏數十拯村堡之漂沒者日凡數千人權宜發廩粟爲糜

鬻以賑事稍定爲鄭丞具牘申大府大府獎許令各屬
皆視陳畱蓋君明達政體又勇於爲義若此及從仕議
論侃侃無媿阿巡撫明德公聞而異之會八月鄉試巡
撫例爲監臨召君至前語三數夜更闌始退歎曰良二
千石材也借補德興縣白沙關巡檢關界弋陽西境山
深箐密宵小伏聚有程佳者足無指而脛走趨捷爲之
魁君以計擒之盡發其囊橐賊黨駭散君不事鉤距鞫
治得其情民獲安堵上官以爲能檄勘萬年餘干安仁
三縣水災異時奉檄勘災者率坐縣官廨署令吏胥具
簿籍三五日卽去君獨親歷堡屯按戶注籍風雨不少
避有冒賑者輒別識之曰某日某堡見汝矣復來嘗我
耶其人卽叩頭服竟事無濫無遺民德之移任星子縣
青山司地臨鄱陽湖商舶雜泊多市廛君設義塾選其
子弟使向學俗爲一變時明德公已去江西今陝西巡
撫秦公承恩方爲巡道雅知君言於大府列薦牘擢貴
溪縣丞攝縣事民惟恐其不眞授也調署建昌縣涂甲
訟其姪十餘年不決君反覆論以倫理卽引媿服不復
訟縣有宋李尚書公擇書院方議修復而君遽以母憂
歸矣居數年父歿哀毀骨立營窀穸一於誠終喪遂不
復仕君嫻於史事論古今利弊確然釐然有依據小試

輒見效又無有摧抑之者而迄不復試殆所謂善藏其
用者耶君少時南遊至荆沔北上過瀋陽浮海南下泊
東甌所至覽其山川形勝晚歲家居一邱一壑流連竟
日然則君之託寄者遠矣生於雍正五年十一月某甲
子卒於乾隆五十七年八月某甲子年六十有六配蔣
孺人儉肅有婦德與君同歲生乾隆四十五年十月某
甲子卒子二人士模早歿純國子監生女一人適吳縣
諸生張祀純從余遊好古能文將以今年某月合葬於
吳縣吾家山先期請余爲銘銘曰
豫章之峨峨迺蟠曲於澗阿其謂之何豈無膏澤潤其

條柯夫亦將培根毓實而滋長於陽坡

新沐夫亦泚泚然

誥贈中憲大夫福建分巡興泉永海防兵備道歲貢生
候選訓導胡公墓志銘

歲丙午晉涵過蘇州同年胡君世銓知府事政成將報
最畱余府廨出示厥考曉山先生遺文因得窺見先生
之學未幾世銓備兵閩海三年以告養歸旋奉母恭人
諱書來屬爲合葬墓誌讀狀知先生惇德龐固不僅以
文采貽後人而恭人能善成先生之志也先生諱和字
時雍號曉山先世由江南徙居河南夏邑曾祖標祖一
蛟世有隱德考希賢諒直好義贈縉雲縣知縣累贈朝
議大夫刑部陝西司員外郎妣譚恭人先生少端重穎

異甫受書卽求通解出語驚長老父出遊侍母夜讀輒
爲曼聲自相往復母爲解顏曰聆書聲良勝歌聲矣早
歲入縣學食廩餼文譽騰焯前大學士漳浦蔡公時以
侍講督學河南尤器重之檄入大梁書院掌教周吉士
應宿數舉先生文爲諸生式中州知名士胥慕與之交
先生篤志經訓蘄求其貫通好觀宋五子書返躬相參
驗潛心刻厲恥表襮於外文有心得不爲依傍之言人
知先生之文或不盡知先生之學旣而學益邃文益高
應鄉闈屢躋卽先生之文亦不能盡知之也先生不以
介意益修內行篤愛弟彛願督課不少假彛旋領鄉薦

從弟金少失學召與同寢食策勵而啟翼之卒爲名諸
生家居教授從學者日衆因材開諭多所成就脩脯所
入悉以供甘旨侍親疾夜不解衣帶連執親喪倚廬骨
立泣血者五年遂得痿蹙疾時作時止後充貢候選訓
導未仕卒年五十有五先生好爲德於鄉尤加意睦族
賴以養葬及完嫁娶者甚衆性醇粹與人語必盡誠聞
者知感晚歲喜明儒薛瑄書議論益醇蓋自

國初蘇門之學漸被興起中州多克自振立牖世明道
之儒若先生庶幾不言而躬行者然至今里中後進每
述先生之嘉言懿行傳爲矩矱斯非躬行之效歟配李

南江文錄 卷十一
恭人確山訓導宗榮女事姑善測意旨言未及而事畢
備先生中歲多疾佐理家政躬自操作先生歿後命子
從宿儒郭某遊以竟先志世銓服官迎養恆舉先生之
遺訓以爲教故自郎署至觀察所至有聲頌良政者皆
歸本於母賢實能使先生體立用行之學推見於世云
先生生於康熙五十年二月某甲子卒於乾隆三十年
八月某甲子累贈奉直大夫刑部陝西司主事朝議大
夫刑部陝西司員外郎蘇州府知府中憲大夫福建興
泉永海防兵備道恭人生於康熙四十八年正月某甲
子卒於乾隆五十八年四月某甲子由太宜人累封太

恭人男子子三人長卽世銓乾隆三十六年進士分巡
福建興泉永兵備道署按察司使次世鎬殤次世鐘國
學生早世女子子三人長適喬承亮次適王普照三適
陳琪四適王山卓五早世孫男九人曾孫男二人世銓
於某年月日卜葬於某原先生遺澤方長異時宜有豐
碑列於阡首而埏道之文尚質謹摭其學行之大者書
之銘曰

德潤於學學釗於文文之弗耀德鞏學尊效著型家聿
有賢偶衣言紹聞申啟爾後吳歛閩噴醴泉進歌引源
有自濟澁江沱蘊德用章先民有作誦法先民沿伊溯

洛

誥封奉直大夫翰林院編修徐公墓誌銘

徐編修立綱卜宅宣武門之西顏其堂曰循陔侍父母
克備孝養都門士大夫之習於編修者及與編修同舉
鄉會試者歲時起居胥得奉封公杖履飲醇德觀家範
益知啟佑非偶然編修視學安徽迎養使署使事將竣
公先期歸里今年閏四月壽終編修聞赴毀甚倉猝南
奔臨行以埏道之文相誣諉晉涵以累世姻戚又與編
修同鄉舉習知家世事不敢辭公諱肇南號寶山世居
浙江上虞縣之下管鄉八世祖文彪以抗節著聲於明
武宗時旣而羣從多以言事著鄉人所稱爲直諫世家

也曾祖允文縣學生祖驤縣學生贈文林郎山東朝城
縣知縣考大純馳贈奉直大夫翰林院編修公承上世
詩書之澤家雖貧樹志閑遠嘗隨從兄遊宦廣西屏去
游閒之習旋入京師攜子親課之務準於先民矩矱故
鄉親串多來京師者或暇公館穀甫入屢請句繼至無
以應則解衣贈之未嘗以告人歲暮約居簞瓢相對乃
訓其子曰制行無玷闕讀書有心得樂莫大焉因貧約
而隳厥志將處富貴而喪厥志乎聞者歎爲名言編修
先以舉人爲國子監學正卽膺

異數分校京闈洎入詞館典試湖南兩奉

簡命提學安徽並克承公之教公遇

覃恩誥封奉直大夫翰林院編修就養太平使署門生
奉籃舉徜徉於青山白紵閒望若神仙而公束躬樸素
無改於初其素所蘊蓄者然也公以早失怙恃終身思
慕臨祭僂然蹙然若不勝其戚者子姓皆爲感動手輯
家乘前後數十年易橐數四述前徽貽後矩稱善本焉
晚歲居會稽之東偏偕里中耆舊驩然道故公簡默寡
言及稱述先進遺風亶亶不倦惠調族黨鄉人稱之卒
於乾隆五十七年閏四月辛丑距生於康熙五十二年
八月丁丑年八十娶韓宜人有婦德子五人長卽立綱

南江文錄 卷十一
乾隆三十年舉人四十年進士翰林院編修立民國學生立位分發福建鹽大使立本國學生立朝分發廣西州同孫男七人曾孫二人立綱等營宅兆於烏石之原撰日封窆銘曰
五都智巧公獨闇然彌性滋德以全其天以昌其大年穀之者翼翼繩之者縣縣善無有不報視此瀧阡

鄭君墓誌銘

君諱崇禮字敬夫系出滎陽宋南渡後遷居蕭山爲著姓縣人所稱鄭家街者也會祖某祖孝成縣學生贈宣德郎陽穀縣知縣考周道贈修職郎兗州府經歷君少穎異好學有聲旋得寒嗽疾久不愈遂輟業至性逾於人事父母善承意旨執親喪終日哭泣毀瘠強起成禮旣免喪獨居追念呼父母聲與淚俱聞者爲酸鼻嘗謂子之於父母將終其身依恃以生者也嬰兒中道失其母號嗷顛踣卽與以食旨之甘居處之安聞樂之樂必卻去不顧者先王因人事之經而制服三年所以節其

情也然而三年之喪曾不若駟之過隙不須臾而祥矣
禫矣嗚呼服除矣無可加矣則是三年中苟有牽於人
事墨經載塗藉口於經營宅兆之役者是居喪而不得
致其哀也居親喪而哀有不足是人子終其身所爲負
疚也君於免喪後餘哀未忘思慕久而不輟則其所以
慎終者庶幾其必誠必信矣君雖廢舉子業病閒輒手
一編好談史事貫穿終始待戚黨有恩誼乾隆二十五
年二月某甲子以疾卒年五十配吳孺人同縣學生文
煜女早歲侍親疾夜忘其寢及于歸舅姑稱其孝勤於
課子親授章句君旣歿課之尤嚴晝夜紡績供食每述
家世見聞嘉言懿行以爲教意不在生產諸子漸有聞
於時命卜吉壤葬君之考妣於縣之北幹山徐家塢蓋
舉君所欲爲而未竟者令諸子踵而行之用以成君之
志卒以乾隆五十一年八月某甲子年七十有五距君
之歿二十有六年矣子三人嘉謨江西大庾縣小溪驛
驛丞豹文乾隆四十二年浙江舉人樂武早卒嘉謨等
將以某年月日合葬於某原請余爲埏道之文余按狀
而書之爲之銘曰

生而篤念所生歿而相從九京北幹在望兮幽宅孔寧
庶合於禮經

南江文錄 卷十一
三
敕封文林郎平羅縣知縣曾公墓誌銘

宗聖曾子後裔居山東嘉祥者世襲五經博士其分支居河南之固始者實能以孝謹淵茂世其家乾隆三十六年余舉禮部試同歲生曾君力行爲宗聖七十六世裔孫愛其人開敏而懇篤別去二十餘年書來請爲厥考封公誌墓以余習知家世事未嘗以狀述見示也爰就所知者書之封公諱椿年固始縣學生曾祖輝廩膳生贈文林郎祖望鞏縣教諭贈文林郎考詒孫江西安義知縣妣姚氏公以行誼著聞於中州尤以紹聞衣德爲念力行嘗爲余言公負異才嗜讀書務求實用曾子

立事篇所謂博學而孱守之也屢應鄉闈不售無幾微
見顏色制言中篇所謂無悒悒於貧無憚憚於不聞也
造次議論依於儒者本孝篇所謂惡言不出於口煩言
不及於已也胸無城府好交遊始終無間制言上篇所
謂先行後言千里之外皆爲兄弟也晚歲居鄉爲祭酒
後進樂奉其教單居離篇所謂執觴觚杯豆而不醉和
歌而不哀也綜生平言行覈諸先世訓詞所謂能世其
家者於茲益信生於某年月日卒於某年月日配祝孺
人子三人力行甘肅平羅縣知縣力寧庚寅科舉人力
錦國學生力行等卜於某年月日葬公於某原銘曰

讀古人書願見古人古人不可見見其後昆維高明與
廣大在行知而尊聞傳縣縣之世澤尚懿訓其克敦

文學周君墓誌銘

吳江周氏自尚書恭肅公太僕忠毅公以勛猷忠諫著明史海內稱望族乾隆初忠毅之孫有旭之先生者以學行著旭之先生有孫曰文達遊學京師焯有文譽今年春將南歸過余請爲厥考誌墓讀其狀知世家之澤遠矣按狀君諱汝翼字右民號蘭軒爲恭肅公之仍孫忠毅公之元孫曾祖廷祚卽忠毅長子難廕生抗疏復讐祀忠義孝悌祠祖鈿候選州同知考日藻乾隆十年進士以經學爲大師四方學者所稱旭之先生也妣程安人君少開敏應試有司試以詩口占得奇句爲諸生

承庭訓砥礪問學於書無所不窺而必以六經爲根柢
論文於漢稱董劉於宋宗紫陽於明取武進唐氏崑山
歸氏衿奇繪飾之文非所尚也侍親疾不解帶者二十
餘日居憂毀瘠免喪後不復應試鍵戶讀書著江干逸
叟傳以見志生平蹤跡不出八九百里而所至名山悉
窮其勝名不出里巷而稱孝稱弟遠邇無閒言撰著十
餘種不輕出示人而中有實得稱心而言可貽久遠實
能以敦行懋學守其家聲而不在乎名位之榮寵也生
康熙五十二年閏三月卒乾隆五十一年閏七月某甲
子配吳孺人先君二年卒男子子二人長佛大慧而早

殤次卽文達國子監生孫男二人文達將以某年月日
葬於邨氏園之新汗銘曰

天啟忠臣後嗣多昌在吾餘姚者有竹浦之黃吳江周
氏與之頡頏言爲壇宇行爲表坊克縣世澤湛以古香
蔚然松柏賜瑩相望騰精燭夜其文字之光邪

南江文錄
卷十一
五
敕封安人王母朱太安人墓誌銘

乾隆四十一年同年友編修王君葬其考雲巖府君於黃鶯澗晉涵爲之銘踰月而其妣朱太安人卽世將合葬焉復具述寓書屬銘於晉涵按述太安人朱氏山陰白洋里人高祖燮元明少師兵部尚書總督軍務曾祖兆寧明錦衣衛指揮祖路考份俱縣學生妣諸暨陳氏初雲巖府君雅游資游以養審知太安人賢以子責委太安人太安人曰吾夫子以謀養游吾不得吾舅姑驩心而使吾舅姑惟夫子之念吾夫子歸而懲前游裹足杜門將吾舅姑養不充吾無以爲婦吾其早作夜休求

當吾舅姑意以安旅人其可乎由是府君先後往來嶺南二十餘年太安人治門內外事罔有鉅纖悉中程則教子寬嚴當施舅姑皆享高年志愉體健忘府君之游忘府君之素貧也太安人姊適某氏而寡太安人養之終身友喪無聞言無子爲之立後兄客死亦爲之立後府君往游故居發於頽風故居羣從公居也羣從競分瓦甃椽棟亦分太安人太安人曰吾所欲得者先按察公堂楣耳吾將新吾居而敬懸之編修旣貴先考室懸楣承太安人志也居故居時嘗命其甥書朱氏治家格言垂諸廳事中端視喜曰是不愈於丹青乎嗚呼太安人爲婦爲母孝敬敦大體位之古列女蓋無媿焉卒年六十三年二十三歸府君三十六年封安人子女具府君志中銘曰

太安人外祖爲陳老蓮徵待詔而蜚遜遺文就湮太安人女母家寶而藏之若璣若璿太安人明義知本天性固然也嗚呼太安人有令子薪窮火傳

固然也即知太安人亦命于燕嶺水間

人文母家寶而難之昔樂善堂太安人四孫惟本天對

太安人亦即爲刺李蕙婚許而進也文故則太安

昏志中說曰

六十三年二十三國初昏三十六年性安人年文其有

人爲敬然母幸婚婢大豔封之古河文蓋無敬語卒年

誥封恭人吳室董恭人墓誌銘

乾隆五十三年春 國史館撰進故都御史吳公涵列

傳晉涵得與編校之列因得考見公之清操亮節爲吾

浙所引重又舊與公會孫震起同舉禮部試知公名德

裕後世爲清門會震起自浙貽書請爲妣恭人志墓備

聞內政益以信世家之遺澤遠矣恭人董氏考諱浩康

熙五十九年舉人恭人少習女史嫺詩辭母沈早卒以

弱齡持家政事繼母項以孝聞年二十二歸封公自堂

先生爲都御史公冢孫婦承累世清宦後室無貯蓄恭

人躬操作織紡箴紉輒至丙夜事姑徐太安人婉約愉

順太安人先生所嗣母也中歲嫠居歷遭憂患歎曰吾
得新婦迺俾吾息肩也執姑之喪毀瘠幾成疾助治宅
堦一於誠信後數年先生本生考樂昌府君卒先生適
客他所而兄公及季叔皆遠宦恭人親治大事盡哀盡
禮遠近稱孝婦吳氏自都御史公後子姓相繼取科甲
爲石門望族獨封公高才數奇九試棘闈不售而恭人
母家中表兄弟亦多以科名顯里俗議論視爲苑枯輕
有所軒輊恭人處之澹然未嘗有幾微怨尤見辭色封
公壯歲遠遊自胥江邗溝歷關陝閩嶠恭人持門戶內
外秩如惟嚴於課子嘗曰易稱家有嚴君焉父母之謂

也言父母俱宜於嚴也後世子女廢棄胥由溺愛且父
之耳目有限有母爲之彌縫掩飾後遂肆志妄爲而不
可挽子之賢不肖責在母也其言合於古訓舉類此前
人論世家興替多視其內政婦人習晏惰各私其子幼
歲任荒嬉長益驕恣卒以隳其家聲恭人教子以嚴用
能啟光顯於令子以振其前基是可爲舉世爲世家婦
者法震起官於朝令其婦田侍恭人於家克盡孝養戚
黨閒謂恭人順德所積漸云卒於乾隆四十九年五月
某甲子距生康熙四十五年六月某甲子年七十有九
三遇

覃恩岫安人宜人晉封恭人子二人長震起辛卯科進士改庶吉士歷吏部稽勳司郎中次震遼廩膳生早卒女三人長適國子監生張宗源次適國子監生徐景陽季適汾州府知府雷汪度孫男五人孫女二人銘曰
作嬪世胄兮終身勤劬約居葆素兮簞瓢晏如授遺書兮陳先謨送遠宦兮慰倚閭子有令聞兮揚國華紡訓用昭兮克世其家

